

Larian amal mahasiswa UMP dan amalan gaya hidup sihat



Pekan, 18 April - Lebih 600 peserta dalam kalangan mahasiswa Universiti Malaysia Pahang (UMP) bersama-sama dengan anak-anak yatim mengambil bahagian dalam program Larian Amal Penyayang 2.0 di sekitar kampus UMP Pekan, baru-baru ini. Lebih menarik program turut disertai dua orang personaliti artis jemputan iaitu Norman Hakim dan Fida Ibrahim yang sama hadir memeriahkan program.

Selain bertujuan mengumpul dana untuk disumbangkan kepada rumah kebajikan dan anak yatim, program anjuran Kelab Penyayang itu bertujuan mendekati dan bermesra dengan anak-anak yatim dari Rumah Anak Yatim Permata Camar, Permata Insyirah dan Rumah Amal Hembusan Kasih Sayang.

Pengarah program, Nur Najmi Nazihah Che Razali berkata, program ini merupakan penganjuran kali kedua melibatkan mahasiswa UMP bersama anak-anak yatim. Selain larian aktiviti yang diadakan adalah pertandingan mewarna dan Forum Gaya Hidup Sihat bersama selebriti.

"Forum ini memberi peluang kepada mahasiswa dan anak-anak yatim bertemu dengan selebriti untuk membicarakan tentang amalan budaya hidup sihat. Ianya termasuklah sikap bijak membahagikan masa untuk tampil sihat, cergas dan merencana masa depan untuk berjaya dalam kehidupan," katanya.



Gabungan mantap dua artis ini juga membuatkan pelajar tidak kering gusi mendengar perkongsian celoteh mengenai penjagaan kesihatan dan budaya hidup sihat. Kedua-dua mereka turut berkongsi aktiviti dan jadual masa untuk sentiasa tampil cergas dan sihat dengan amalan beriadah bagi membolehkan mereka menjalankan rutin seharian yang agak padat.

Majlis perasmian penutup diserikan dengan kehadiran Pemangku Pendaftar, Abd Rahman Hj Safie yang turut menyampaikan hadiah kepada pemenang larian amal dan pertandingan mewarna kepada adik-adik dari rumah anak yatim tersebut. Hadir sama Penasihat Kelab Penyayang, Rozana Shahadan.

Abd Rahman dalam ucapannya memuji inisiatif mahasiswa yang berjaya menganjurkan program ini dan mengharapkan dapat menjadikan sebagai program tahunan dan dapat dilaksanakan dengan impak yang lebih besar serta melibatkan lebih ramai penyertaan.



Katanya, penganjuran program ini merupakan sebahagian usaha menyemai budaya prihatin dalam kalangan mahasiswa UMP untuk mendekatkan diri dengan masyarakat dan golongan kurang bernasib baik malahan usaha ini dilihat sebagai menyahut seruan Naib Canselor UMP, Profesor Dato Dr Daing Nasir Ibrahim yang memberi penekanan terhadap amalan gaya hidup sihat.

Selain itu, inisiatif penganjuran ini program ini juga selari dengan hasrat universiti dalam mempergiatkan usaha bersama komuniti. Dalam program ini juga sebanyak seribu lima ratus ringgit berjaya dikumpul hasil sumbangan mahasiswa UMP telah diserahkan kepada ketiga-tiga rumah anak yatim tersebut.



Disediakan Unit Perhubungan Awam, Bahagian Komunikasi Korporat PNC

Posted By : NOR FADZILLAH BINTI ZULKIPLI Date Posted : 22-04-2015, 11:00:02